

## REGIONAL NEWS BULLETIN

### HEADLINES (EVENING)

1. Tun hnai a thlipui, rial leh ruah surin Mizoram a chhiatna a thlen hriat theih chinah mi pakhat a thi a, 5 an hliam a, ran vulh lai pakhat a thih bakah building 2,646 a tichhia a ni.
2. MPSC Chairman Pu JC Ramthanga'n MPSC in Exam kalphung dan mumal tak, dik leh rintlak a neih thu leh, tunhnaia MPSC hlutna tihnam thei zawnga hmalakna awm chu tha lo a tih thu a sawi.
3. Congress Party chuan an sarwkar chuan inhlawhfa te nitin hlawh theih zat hniam ber minimum wage chu Rs. 400 ah tihsan a tiam
4. Chief Election Commissioner Rajiv Kumar chuan district thlan bika Municipal Commissioner leh District Election Officer te chu vote thlak an tam theihnana booth-wise action plan ti chak turin a chah.



### DISASTER

Tun hnai a thlipui, rial leh ruah surin Mizoram a chhiatna a thlen hriat theih chinah mi pakhat a thi a, 5 an hliam a, ran vulh lai pakhat a thih bakah building 2,646 a tichhia a ni.

Disaster Management and Rehabilitation Director Pu Benjamin Lalzama'n Akashvani Aizawl a hrilh danin thlipui leh ruahpui-in a nuai avanga thing tlu-in Pi Malsawmtluangi kum 45, Aizawl Bungkawng veng cheng chu a delh hlum a. Aizawl district-ah hliam 5 awmin an zing ami pakhat chu State Referral Hospital Falkawng enkawl mek a ni a. Aizawl district-ah vek ran vulh lai thi pakhat a awm bawk. Building chhia 2,646 zinga 335 hi thli, ruah leh rial-in a tihchhiat vek a ni a, a dang 2,311-te chu chhe nasa leh a then chauh chhiate a ni hlawm. Kolasib district-in thlipui, rial leh ruah hi an tuar nasa ber a. In chhe vek hi 176 zet a awm a, a vai a chhia ni lo 655 a awm bawk. Aizawl district-in dawtin in chhe vek 74 leh a then chauh chhia in 561 a awm bawk a. Lawngtlai district-ah hian in chhe vek hi 5 chauh a awm chungin a then chauh chhia hi 366 zet a awm a ni.

Heng khuarel chhiatna lo thleng avang hian Mizoram sawrkar leh a kaihhnawih Department te chuan rang taka hma la in ngaihven nghal a ni a. Thawhtanni khan DM&R Minister Pu K. Sapdanga hovin Secretary DM&R, Director DM&R leh Officer ten inkhawm hmanhmawh kovin chhiatna lo thleng

chung changa hma lak dan tur leh chhawmdawlna chung chang ngaihtuah nghal a ni a. Nilaini khan Chief Secretary hovin a kaihhnawih Department hrang hrang te nen hma lak dan tur ngaihtuahin inkhawm koh a ni a, Secretary DM&R ho te leh Director DM&R ho te in Officer leh hnathawk dangte an thukhawm thin bawk.

District tina bawrhsap ruat Zonal Officer te'n a hmunah chhiatna lo thlen dan te enfiah nghal zel a ni bawk a. Tichuan district tin a DEOC atangin SEOC-ah report hi englai pawha pek reng a ni bawk. District tin a DC/DDMA te hian an district theuh ah SDRF (Response & Relief/recovery & Reconstruction) fund an kawl sa theuh atangin hmanhmawh takin a theih ang angin chhiatna tawkte hnenah tanpuina an lo pe chhuak mek zel a. DM&R Aizawl atang leh DDMA thenkhat ten inchhe thawmthatna atan rangva leh silpauline te pek an ni bawk.

Tunah hian sawrkar hotu te leh Department kaihhnawih hotu te hmalakna in chhiatna tuarte chhawmdawl na atan SDRF sum atanga hmanhmawh taka rangva leh silpauline lei nghal tur a tih a nih angin rang taka order siam nghal a ni a. Rangva hi engemawzat lo thleng tawh in a vawikhatna atan Aizawl District tan nimina sem chhuah tura ruahmanna siam nghal a ni a. Rangva leh silpauline dang te pawh lo thleng thuai tur a beisei a ni.

SDRF sum pawh hi hmanhmawh thilah dil belh nghal a ni a, rang takin sawrkar leh department hotu ten bawhzui ni-in nimin khan engemawzat Finance Department atangin hmuh nghal a ni a, vawiin hian district zawng zawng DC/DDMA ah an mamawh zual phuhruk ngei theih turin pek chhuah nghal vek theih beisei a ni. Heng SDRF sum an pek chhuahte atang hian SDRF danin a a phalsak ang chin zelah DC/DDMA te hian an bial chhunga chhiatna tawkte tan hian tanpuina an pe chhuak zel dawn a. Tanpuina atan hian In chhia, thlai chhia, ran thi leh mihring thi leh hliam te awm dan DDMA tin ten uluk taka enfiah a chhutchhuah niin a theih ang anga tanpui zel tur an nih dawn thu Director chuan a sawi a ni.

**(Desk)**

<><><>

MPSC Chairman Pu JC Ramthanga'n MPSC in Exam kalphung dan mumal tak, dik leh rintlak a nei a ti a, tunhnaiah MPSC hlutna tihniam thei zawnga hmalakna awm chu tha lo a tih thu a sawi a, MZP in tunhnaia MPSC exam buatsaih felfailo awm chungchanga bang tura an phut ah Ban a tum leh tumloh erawh a sawilo a ni.

MPSC Chairman hian vawiina chanchinbumite a kawmna-ah an hun chhungin exam kalphung an siam tha nasa hle a, state danga an tihdan Mizoram hman tangkai theih zir an intir thin a ti a, Ziak loha kalphung tihdan hmasa te ziakin dah a ni a, hna chu a tam thei ang khaikhawmin hmalakna tam tak an kalpui niin a sawi a. Tunhnaia MPSC hlutna tihniam thei zawnga hmalakna awm chu tha an ti lo a, exam kalphung dan mumal dik leh rintlak tak an nei tih a sawi. Pu JC Ramthanga chuan MPSC chu nasa takin thuam chak zawk an ngai a, tunah pawh hmasawna tam tak a awm tawh tih sawiin thawktu an neih belh zel a ti a, Mizoram sawrkarin mawhphurhna a pek chu tha taka hlen chhuah an tum tih a sawi bawk.

MPSC hotute sawi danin Answer sheet-a nawhreh leh siamthat awm thin chu tunhma atanga an kalpui tawh thin ani an ti a, exam chhanna endiktu chu chhawng hrang hrang an siam a ti a, MPSC in written exam an neiha zawhna chhanna endik dan chu Evaluation chhawng 3 in uluk taka en thin niin hemi

chhawng 3 a kal tlang hma loh chuan written result tihchhuah a ni ngailo a ti a. Scrutinizer-in an tihfel tawh hnuah MPSC in a tidanglam tawh ngailo tih sawiin MPSC exam buaipuitute chhungkhat hnaivai an exam dawnah in report thlapin an chhungte an exam dawn chuan confidential paper an khawih thei lo a ti a, engkim dik tak leh fair taka kalpui thin ani an ti bawk. MPSC thuneitute sawi danin MCS Combined exam 2023 chungchangah hian Gauhati High Court, Aizawl Bench ah Writ Petition thehluh a ni a, MPSC laka thehluh chungchang chu ngaihtuah turin Court ah a awm mek an ti bawk.

**(Corr)**

<><><>

Chief Minister Pu Lalduhoma'n tunhnaia Mizoram dung leh khuarel chhiatna avanga in leh lo leh thildang chhiatna tuartu chhawmdawlina tur chu sawrkar hmasa lamah rei tak rial a, nghah ngai thin chu ZPM sawrkar kalphung tharah erawh a hun takah pekchhuah a ni tih a sawi.

He thu hi vawiina ZPM Serchhip Block Political Training New Venglai YMA Hall-a neihah sawiin Chief Minsiter Pu Lalduhoma'n tunhnaia Chawlhni serh lo anga an puhna chungchang sawiin kumtin March ni 31 chu sawrkar kumtawp a nih avangin sawrkar a chawlh theih loh a ti a. Leiba tam tak chhawm an nih avanga inrenchem tak chungah insawhnghehna kum puang an ni tih sawiin Finance Minister in Sawrkar kumtawpa Finance Department a hnathawktute a tlawh vawi khatna a nih bakah Treasury a thawktute pawh an lo lawm hle tih a sawi.

Pu Lalduhoma chuan ni 100 chhunga thawh tura an ruahman tha taka an hlen thei chu lawmawm a tih thu a sawi a, Sawrkar kum thar lamah hmasawna lian thawh theih tawh an inbeisei tih a sawi bawk.

Serchhip Bialtu MLA Pu Lalduhoma chuan ZPM party chu rorellai party lo awm tawh thinte ang lo takin an danglam bik a ti a. Mizoramah khawtlang siamthatna thlentu a ni chho mek tih sawiin puipunna leh party thil tikhawmna-ah zu leh ruihtheih thilin hmun a chang lo chho zel chu lawmawm a tih thu a sawi a, Lok Sabha inthlanpui lo awm turah Zohnahtlak tan mi tangkai tur leh Mizoram State sawrkar leh Sawrkar laipui inkara palai hna thawktu tur ZPM Candidate Pu Richard Vanlalhmangaiha chu vote theuh turin mipuite a sawm bawk.

**(Corr)**

<><><>

## SCHOOLS RE-OPEN

Mizoram sorkar hnuaiia school hrang hrang te chuan vawiin atang khan kum 2024-2025 Academic session atan school an lut tan.

School Education Director Pu Lalsangliana chuan school kai tan ni-ah hian zirlaite leh zirtirtute duhsakna a hlan a. Session hmasaa an lo tih angin NEP 2020 angin zirlai lut tharte'n school kal nuam an tih theih na'n Vidya Pravesh kalpui chhunzawm a nih thu sawiin zirna chu ram hmasawna hnukpui ber a ni a ti bawk. Director chuan sikul zawng zawng theihtawp chhuah theuh turin duhsakna a hlan a, Session hmasa atanga an lo kalpui tan tawh sawrkar enkawl school-a zirlai naupang ten uniform inang hak chu chhunzawm a la ni a, thlak danglam a la awmlo a ti bawk.

Kumin ah hian zirlaibu indaihlohna (chhut zawh hman loh) a awm dawn lo ni a thudawn a ni a, school uniform lam pawh school tinin an peih fel thawkhat hman ni a hriat a ni bawk.

**(Corr)**

<><><>

#### **CAR RENTAL**

Adviser to CM Pu TBC Lalvenchhunga'n All Mizoram Car Rental Association ten an puhna chungchangah Dan hmanga hmalak a nih dawn thu a sawi.

Adviser to Chief Minister, (Finance leh Planning changtu) Pu TBC Lalvenchhunga chuan All Mizoram Car Rental Association ten an puhna Lok Sabha inthlanna lo awm tura Election Official Duty te tana Car Rental hman a nih chungchangah thuneihna dik lo taka hmang leh mimal hamthatna atana hmang anga an puhna chu ngawih bopui chi nia a hriat loh thu a sawi a. Dik lo taka inpuhna leh intihmingchhiatna a awm ni a sawiin hemi chungchangah hian dan anga hmalak a tum tih sawiin tun hnuah tu chungah mah thleng tawh lo se tih thuchhuah ah a tarlang a ni.

All Mizoram Car Rental Association hi nizanah thutkhawmin Parliament inthlan lo awm tura rental car hman chungchangah Adviser to CM Pu TBC Lalvenchhunga chu thuneihna hmang sualah puhin bang turin an phut a. Mizoram sawrkar an hrawn tawh zingah election official te tana rental car hman chungchangah tun hma in thil fel lo ala awm ngai lo tih sawiin an buaina tawh chu a rang thei ang bera chinfel ni se an duh thu an sawi a ni.

Car Rental Association sawi danin tuna Lok Sabha inthlan lo awm tura election official duty te tana car rental hman a nih chungchangah an pawl member-te motor chu hman a ni lo an ti a. An member ni duhlo TBC Car Rental te chauh koh an ni chu an hrethiam lo tih an sawi a. TBC Car Rental neitu TBC Pu Lalthantluanga chuan a unaupa Adviser to CM Pu TBC Lalvenchhunga, MLA thuneihna dik lo takin ama mimal hamthatna atan an hmang chu pawl an tih thu sawiin an resolution chu Chief Minister hnenah leh Transport Minister hnenah an thehlut a, an ngenna chu April ni 10 ral hma ngei a tih hlawhtlin an phut tih sawiin an tih hlawhtlin loh chuan hma an la zel dawn tih an sawi bawk a ni.

**(Corr)**

<><><>

#### **HOME VOTING IN KOLASIB**

Tukin khan DC Office, Kolasib tualzawl atangin kum 85 chung lam leh pianphung a rualban lo, vote thlak tur a Polling Station pan kawng a harsatna neiten an mahni in luma vote an thlak theih nan Home Voting Team panga kalchhuakte chu Pu John LT Sanga, Deputy Commissioner-in a vai liam.

Home Voting Team-te hi April ni 5 leh ni 6 chhung hian Tuirial, Kolasib leh Serlui Assembly biala kum 85 chung lam leh vohbik, Polling station pan kawng a harsatna neite an tlawh chhuak ang. Tuirial Assembly bialah kum upa vote nei 21 leh vohbik vote nei 7, Kolasib Assembly bialah kum upa vote nei mi 48 leh vohbik vote nei mi 12, Serlui Assembly bialah kum upa vote nei mi 45 leh vohbik vote nei 10, mahni in luma vote thlak tur chhinchhiah an ni.

**(Andrew Vanlalauva, PTC Kolasib)**

<><><>

## **DROWNED**

Vawiin chawhnu dar 2:00 vel khan Thenzawl Hermon veng naupang kum 5 mi, Junior Chawngmingthanga Pu Lalzidinga fapa chu Sangha Dilah a tla hlum.

He naupang hi a nu Pi Esther Lalchhuanmawii insukna, Donbosco School thlanga Pu R. Lalzauva Dilah a nau kum 3 mi nen an cheng a. A nau zawk tuiah a tla tep chumi a kai chhuak chu Chawngmingthanga zawk hi a khur thuk laiah a petek lut a, a tla zui ta a ni. Mi tlawmngaite'n an lak chhuah hian a lo thi fel hman tawh ni a hriat a ni a, Zaninah lumen a ni ang.

**(C. Lalhminghlua, PTC Serchhip)**

<><><>

## CONGRESS MANIFESTO

Congress Party chuan an sarwkar chuan inhlawhfa te nitin hlawh theih zat hniam ber minimum wage chu Rs. 400 ah tihsan a tiam. Vawiina an manifesto tlangzarhah he thu hi tarlan niin mi rethei chhungkaw tin hnenah kum khatah cheng nuai khat pek te, central sawrkar hnaah hmeichhe tan zaa 50 hauhsak te, Minimum Support Price an tiam bakah national caste census neihte an tiam a ni.

Vawiina New Delhi-a Congress party manifesto tlangzarhnaah hian Party president Mallikarjun Kharge, party leader senior Sonia Gandhi leh Rahul Gandhi te pawh an tel a ni.

(Newsonair)



## CEC

Chief Election Commissioner Rajiv Kumar chuan district thlan bika Municipal Commissioner leh District Election Officer te chu vote thlak an tam theihnana booth-wise action plan ti chak turin a chah. Hei bakah hian Pu Kumar-a chuan khawpui leh thingtlang tana ruahmanna tha tak siam tur leh mipui tumbik neia ruahmanna siam turin a chah bawk a ni.

Vawiin khan district thenkhat vote tlak that lohna thina Municipal Commissioner leh District Election Officer te chu vawiin khan kawmin democracy kutah hian voter tam thei ang ber an tel theihna tura hmala turin a chah a ni.

*(Newsonair)*

<><><>